



Gabinete Wever - Croes II



ISLA ONLINE


Noticia di Gobierno

2023

Diahuebs 9 Maart 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



'SI NOS NO TA NA MESA COMO HENDE MUHE, NOS NO POR KEHA SI HENDE HOMBER NO TENE NOS NA CUENTA'



Centro di Desaroyo di Hende Muhe (CEDEHM) a organisa un encuentro bunita na MFA Paradera den cual a trata e tema di Dia Internacional di Hende Muhe e aña aki "Embrace Equity". Durante e encuentro nan a presenta diferente aspecto importante di con pa duna un persona den su situacion personal locual cu e tin mester pa e tin participacion igual den comunidad.

Riba Dia Internacional di Hende Muhe ta reflexiona riba tur locual cu hende muhe a logra, pero ta para keto tambe y realisa cu tin caiminda pa bay ainda. Durante e conferencia di Nacionnan Uni cu Prome Minister a atende e siman aki na New York, a para keto na diferente crisis cu ta afectando paisnan rond mundo. E crisisnan aki ta afecta particularmente hende muhe, mas cu hende homber, pues esaki ta muestra cu tin mas trabou pa haci rond mundo y aki na Aruba tambe, Prome Minister a enfatisa

"Mi ta convenci y determina hunto cu e potencial di hende muhe cu tin na Aruba, pa sigui traha pa crea oportunidadnan

pa nos mucha muhenan awe, cu majan nan por yega na e posicionnan cu nos kier pa nan yega."

Prome Minister Wever - Croes ta enfatisa riba e importancia pa crea oportunidad pa hende muhe den futuro: "Si nos ta na mesa como hende muhe, nos no por keha si hende homber no tene nos na cuenta. Si no tin mas hende muhe cu ta bay den politica, bo no ta bay haya mas hende muhe den gobierno. Eorey no por keha cu hende homber ta tuma decision sin tene cuenta cu nos."

Concluyendo, Prome Minister ta duna pabien na CEDEHM y gradici nan cu e bunita encuentro cu nan a organisa na MFA Paradera. Y felicita nan tambe cu e tremendo trabou cu como organisacion nan ta haci henter aña pa empodera hende muhe na Aruba. Ademas ta haci apelacion na henter comunidad, sector publico y sector priva, pa traha hunto pa stimula nos mucha muhenan pa nan desaroya nan mes pa ocupa e posicionnan relevante aki tambe den futuro.

Continuacion SI NOS NO TA NA MESA COMO HENDE MUHE....



Premier Evelyn Wever - Croes: **COMO HENDE MUHE NOS MESTER CARGA E RESPONSABILIDAD PA SIGUI CREA OPORTUNIDAD PA HENDE MUHE DEN FUTURO**



Riba Dia Internacional di Hende Muhe, Prome Minister Evelyn Wever - Croes a atende un conferencia organisa pa Lindy Croes y Julisa Hoevertsz, "Ladies Leading Conference: Embrace Equity".

E sala tabata yena cu hopi entusiasmo di parti esnan presente y a comparti hopi informacion positivo. Prome Minister Wever - Croes ta gradici e dos damanan dinamico cu a organisa e conferencia aki. Semper e ta bon pa hende muhe inspira nos mes y regarda e energia pa por sigui cu trabounan.

Finalisando Prome Minister a bisa: 'Aruba tin hende muhenan fuerte, lanta door di generacion di hende muhenan fuerte cu a traha duro pa hende muhe ta unda nos ta awe. Awo nos mester carga e responsabilidad aki pa sigui crea oportunidadnan pa hende muhenan den futuro tambe por sigui logra cosnan grandi pa Aruba. Pabien na organisadornan cu e exitoso conferencia aki!'



Prome Minister Evelyn Wever-Croes: CELEBRACION DI PROME ANIVERSARIO Y APERTURA DI OFICINA DI BOLD PROPERTIES ARUBA

Riba dia Internacional di Hende Muhe, a tuma luga e celebracion di e prome aniversario y apertura di e oficina nobo di BOLD Properties Aruba. BOLD Properties Aruba ta un compania di "real estate" cu ta consisti di un team di solamente hende muhe lidera pa Aileen Kelly y Jennifer Figaroa.

Como invitado, Prome Minister Evelyn Wever-Croes tabata presente pa comparti e momento special aki cu e team y invitadonan. Prome Minister a expresa cu e logro aki sigur ta un inspiracion pa tur hende muhe, y pa nan realisa cu tur loke nan propone nan mes, nan por logra cu fe y determinacion. "E damanan aki a drenta un mercado estableci caba pasobra ta hopi compania renombra tin na Aruba cu ta haci e trabou di "real estate", pero nan a bin cu determinacion y na un manera hopi innovativo, uzando medionan social. Awe cu orguyo nan ta celebra nan prome aniversario y sigur hopi mas den futuro", Prome Minister a remarca.

Prome Minister ta felicita Aileen Kelly, Jennifer Figaroa y e team completo di BOLD Properties Aruba cu nan prome aniversario, y ta spera cu esaki ta un ehempel y inspiracion pa cada hende muhe aki na Aruba.





Riba Dia Internacional di Hende Muhe

MINISTER XIOMARA MADURO TABATA PRESENTE NA E PROME ANIVERSARIO Y APERTURA OFICIAL DI BOLD PROPERTIES



Dia Internacional di Hende Muhe tabata un fecha extra special pa e dos damanan Aileen Kelly y Jenniffer Figaroa. Ambos, ambicioso y yena cu creatividad a lansa oficialmente Bold Properties riba e fecha aki.

Bold Properties ta un compania di real estate aki na Aruba cu ta consisti di un team completo di hende muhenan cu ta sostiene y empodera otro cual ta haci e compania aki uno excepcional na unda cu e poder femenino ta domina.

"Tabata un placer pa t'ey presente na e prome aniversario y apertura oficial di Bold Properties. E dos damanan, Aileen Kelly y Jenniffer Figaroa hunto cu nan team di hende muhe ta realisa nan soño di ta un compania di hende muhe Arubiano den e mundo di 'real esate' na Aruba."

Minister Xiomara Maduro ta desea e team completo hopi exito y ta gradicinan pa kere den Aruba y sigur den nan mesun potencial. "Be BOLD ladies!" tabata palabra final di e mandatario.

UNION TA E FORSA DI NOS BARANCA TAN STIMA.

POETA DI PATRIA 2023

FECHA: DIARANSON 15 DI MAART 2023

ORA: 7:00 PM – 10:00 PM

LUGA: CAS DI CULTURA

ENTRADA GRATIS

PROME PREMIO
AWG. 1000,-

SEGUNDO PREMIO
AWG. 500,-

TERCER PREMIO
AWG. 250,-

Ultimo dia pa inscribi ta diabierna dia 3 di maart 2023.
Ultimo dia pa entrega poema ta dialuna dia 6 di maart 2023
Mail bo poema na: artedipalabra@gmail.com



Geoffrey Wever
MINISTER

SECTOR PRIVA TA CUMPLI CU E LOONSUBSIDIEREGELING



Durante pandemia Gobierno di Aruba a introduci e Loonsubsidieregeling pa duna apoyo financiero na dunadornan di trabao pa por sigui paga un parti di e salarionan di nan empleadonan y asina yuda mantene mas hopi posibel e cuponan di trabao. Esaki tawata importante pa suavisa e caida drastico di nos economia y mantene e consumo di trahadornan y benta di companianan.

Dunadornan di trabao a ricibi e subsidio salarial den forma di un voorschot den e periodo di 1 mei 2020 pa 31 oktober 2021. E pago di e voorschot a wordo hasi door di SVb a base di e perdida di benta di por lo menos 25% indica door di e mesun companianan. Un total di 423 miyon florin a wordo otorga na subsidio salarial pa cubri te un maximo di 60% di e salario di e empleado.

Na 2021 a determina oficialmente e perdida di benta a base di aangifte di BBO entrega. SVb a determina a base di e

informacion oficial aki e suma definitivo di loonsubsidie. A conclui cu a otorga 145,5 miyon florin di mas na dunadornan di trabao mientras dunadornan di trabao a ricibi 18,2 miyon florin di menos. Pa tur luna cu a ricibi loonsubsidie, dunadornan di trabao a ricibi un “toekenningsbesluit”. Si dunadornan di trabao no tawata di acuerdo cu esaki, por a entrega bezwaar y eventualmente bai den beroep.

Banda di otorga e loonsubsidie, SVb ta e instancia responsabel pa recobra e suma otorga di mas na loonsubsidie. Na final di 2021 dunadornan di trabao na ken a wordo otorga loonsubsidie di mas, a ricibi un carta cu informacion di e loonsubsidieregeling y tambe di e “invorderingsproces”, e proceso pa debolbe bek e suma ricibi di mas. Tambe dunadornan di trabao a wordo pidi pa debolbe bek e suma ricibi di mas of cera un areglo di pago. Na maart 2022 un recordatorio di pago a wordo manda sigui pa un aanmaning. Desde april 2022 e proceso di recobra e suma ricibi di mas na loonsubsidie a cuminsa.

Recientemente ministerio di Asuntonan Economico, Comunicacion y Desaroyo Sostenibel a ricibi di SVb e relato di loonsubsidieregeling 2022.

Den 2021/2022 un suma di 13 miyon florin na bezwaar a wordo declara hustifica y Corte a duna dunadornan di trabao razon den otorgamento di loonsubsidie na un balor di 6,5 miyon florin. Den proceso di tratamiento tin un cantidad di bezwaar cu un balor di 29,1 miyon florin y Corte tin cu duna su veredicto ainda riba otorgamento di loonsubsidie cu un balor di 700 mil florin. Na final tin un suma di 96,2 miyon florin paga di mas na loonsubsidie pendiente cu por wordo existi di inmediato door di SVb. Di e suma aki, SVb a ricibi 39,6 miyon florin. Pa loke ta trata e suma di 18, 2 miyon florin cu dunadornan di trabao a ricibi di menos, SVb a paga 13,2 miyon florin na dunadornan di trabao.

E relato di loonsubsidie 2022 ta demostra cu sector priva ta cumpli pa debolbe e suma ricibi di mas pero tambe a hasi uso di nan derecho den caso a ricibi di menos. Esaki ta muestra cu e ehecucion di e loonsubsidieregeling tawata un instrumento esencial durante pandemia pa combati e impacto negativo riba nos economia di Aruba segun minister Geoffrey Wever.

Minister Geoffrey Wever:

BOLD PROPERTIES A INAUGURA NAN OFICINA NOBO RIBA INTERNATIONAL WOMEN'S DAY



Aruba a celebra International Women's Day den gran forma, reconociendo e esfuerço y contribucion di empresarionan hende muhe. Minister di Asuntonan Economico, Comunicacion y Desaroyo Sostenibel, Sr. Geoffrey Wever, a atende e "ribbon-cutting ceremony" pa e apertura oficial di Bold Properties Aruba, un empresa cu ta pertenece completamente na partnernan hende muhe. Esaki ta significante pa Aruba, ya cu ta promove igualdad di genero y empoderamento di hende muhe den mundo di negoshi. Bold Properties Aruba ta creando inspiracion pa otro hende muhe cu ta desea di logra exito empresarial.

Bold Properties Aruba ta un ehempel excepcional di hende muhe cu ta tuma carga di nan carera y ta inverti den nan mes. E determinacion y curashi di e propietarionan di e empresa ta un bon prome paso pa duna bon resultado. E apertura di Bold Properties Aruba tambe ta demostra cu muhe por prospera



den campo di trabou cu ta convencionalmente domina pa hende homber, loke por ser considera un triunfo pa igualdad di genero.

"Aruba ta un pais cu ta balora y promove derecho di hende muhe y igualdad di genero", segun minister Wever. Esaki ta demostra cu hende muhe por logra loke nan ta desea, y ser empresario ta un ehempel di esaki. Riba Dia Internacional di Hende Muhe, Aruba ta festeha e exitonan actual di nos empresarionan muhe, y ta anhele pa mas ser inspira pa sigui den e pasonan manera di Bold Properties Aruba.

Minister Wever ta desea Bold Properties Aruba tur clase di exito, y ta desea un bes mas tur hende muhe di Aruba, un felis dia di hende muhe!

Minister Geoffrey Wever:

KID\$PRENEURS A CONCLUI NA SCOL DORNASOL DI SABANA BASORA

E biaha aki Kid\$preneurs a continua na Tra'i Merdia di Scol Dornasol na Sabana Basora. Aunke e biaha aki a conta cu un grupo mas chikito, e tarea di educa y inspira nos hobennan ta keda mesun importante.

“Mi ta contento di por a mira algun mucha cu hopi gusto, vision, y te asta algun conocimiento di e elementonan pa maneha un empresa”, segun minister di Asunto Economico, mr Geoffrey Wever.

E futuro briyante di Aruba ta den man di nos hobennan, y nos mester sigui cu esfuerso pa sostene nan den nan soñonan, y inspira nan pa ta e miho persona nan por ta, eliminando cualkier barera na nan creatividad!

Sea den nan futuro nan lo escohe pa bira empresario of no, ta spera cu e curso di Kid\$preneurs por yuda inspira algun mente



hoben pa nan haci cualkier tarea cu nan lo kier eherce. “Nan por conta cu nos sosten”, minister Wever ta enfatisa.

Danki un bes mas na Departamento di Asunto Economico y nan unidad di IDEA pa nan determinacion. Proximamente lo continua cu e proyecto di Kid\$preneurs na Scol di Kudawecha.

CONVENIO CU CAMARA DE COMERCIO COLOMBO-HOLANDESA “HOLLAND HOUSE” NA COLOMBIA

Minister Geoffrey Wever a cera un convenio cu Holland House na Colombia. Holland House ta un e di e Camaranan di Comercio Bilateral mas grandi na Colombia, cu hopi experiencia den asisti companianan Hulandes ora nan kier haci negoshi cu companianan Colombiano.

E convenio cu Holland House ta haci posibel cu tambe companianan di Aruba por haya e ayudo y cooperacion necesario pa haci negoshi cu companianan na Colombia. Esaki lo resulta den un contribucion positivo pa e economia di Aruba, expandiendo e netwerk comercial.

Aruba su economia ta uno chikito y ta depende riba importacion di mayoria di productonan. Cu un posicion strategico den Caribe entre Merca y America Latino ta esencial pa explora oportunidadnan comercial cu ta na beneficio di nos comerciantenan y consumidornan. P'esey ta sumamente importante pa intensiva e relacionan economico cu paisnan den region. E relacion cu Colombia tin cu Aruba ta uno esencial mirando e cercania y e potencial pa haci diferente tipo di negoshi.



“Un convenio y e cooperacion cu Holland House Colombia ta un instrumento esencial pa facilita negoshi y inversionnan entre Aruba y Colombia y ta forma parti di e maneho economico pa nos companianan crece y nos consumidornan tin mas acceso na productonan na prijsnan mas bentahoso, y asina reduci e costo di bida aki na Aruba”, segun minister Geoffrey Wever.



INSTALACIONNAN PA MAS ILUMINACION DEN BARIO DI SAN NICOLAS A INICIA COMO PARTI DI E PROYECTO DI VEILIGE BARIOS

Manera ta conoci, na januari Minister di Husticia y Asuntonan Social Sr. Rocco Tjon a reuni cu ambos DTI y Elmar, pa asina e proceso pa cambia e luznan di 28W pa 60W pa mas iluminacion den e bario di San Nicolas por cuminsa. Esaki ta parti di e proyecto multi-ministerial "Veilige Barios", caminda hunto cu CEDE Aruba, ta bay percura pa eleva e seguridad den barionan pa henter comunidad, a traves di diferente programanan pa cu e centronan di bario, pero tambe a traves di miho iluminacion y camaranan di seguridad.

For di aña pasa a haya aprobacion di e presupuesto pa asina percura pa bin cu 113 punto di iluminacion adicional. Bisando esaki, e siman aki Elmar a cuminsa cu e proyecto aki, den e bario miho conoci como The Village. E importancia di cayanan bon ilumina no por ser subestima. E ta importante pa tin iluminacion adecuado, no solamente pa yuda combati criminalidad, pero tambe pa yuda peaton y conductor pa ta mas sigur riba nos careteranan. Cu e aumento di wattage, residentenan di San Nicolas por spera un miho nivel di iluminacion den nan bario.

Di parti di Ministerio di Husticia y Asuntonan Social, por bisa cu e proyecto aki tin un prioridad halto, mirando cu pronto, nos lo

wak barionan cu mucho mas luz, pa asina mitiga e riesgo di criminalidad of cualkier desgracia di trafico pa motibo di falta di lusamento. Di e manera aki nos ta un paso mas cerca den brinda seguridad na nos hobennan y comunidad henter, pero tambe brinda un miho calidad di bida na nos hobennan den e cuadro social.





MINISTER ENDY CROES TA FELICITA COLEGIO ARUBANO CU UN EXITOSO OPENDAG

Diasabra ultimo, Minister Endy Croes a bishita e opendag di Colegio Arubano. E scol a habri porta pa tur estudiante di klas seis di scol basico, alumnonan cu ta den CB1 of CB2 di MAVO cu tin suficiente punto pa bay HAVO y tur alumno di examenklas di MAVO cu kier sigui nan estudio na Colegio Arubano. Un mainta informativo y educativo unda cu tabatin hopi interes di e estudiante acompaña pa mayornan cu ta preparando pa e aña escolar nobo. Banda di e materianan a mustra diferente actividad escolar.

Tambe tabatin diferente presentacion y demostracion di proyecto manera e.o. Erasmus Plus. E estudiante- y mayornan tabatin oportunidad pa haci pregunta. Por ultimo, Minister Endy Croes ta gradici Sra. Jennifer Arends - Reyes y Sr. Tim Croes pa e tremendo recepcion. Danki na tur alumno y docentenan cu a organisa e opendag.






RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)



Bo kier haci mas?



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad,
Naturalesa y Asuntunan di Adulto Mayor

"Nada no ta cambia, si nada no cambia!
Reconoce bo impacto, un Aruba dushi ta un Aruba cu nos por maneha nos sushi!"
Minister Ursell Arends

www.trashtocasharuba.org

Pa mas informacion:
<https://trashtocasharuba.org/pages/dump-parkietenbos>

Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! _____